

Inissianik attartortitsinermit isertitanik, maanna konto pingaarnermi 72.10.16 Inissiat attartortittakkat ingerlanneqarnerat iluanaarutisiatut immikkoortinneqartunit isertitat ukiuni tallimani annikilliertortillugit isumalluutaajunnaarnissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut
(Inatsisartuni ilaasortaq Bendt B. Kristiansen, Inuit Ataqatigiit)

Akissuteqaat

(Kommuninut, Nunaqarfinnut, Isorliunerusunut, Attaveqatigiinnermut Ineqarnermullu Naalakkersuisoq)

Siullermeerneqarnera

Naalakkersuisut sinnerlugit Inatsisartuni ilaasortaq Bendt B. Kristiansen Inuit Ataqatigiinneersoq aalajangiiffigisassatut siunnersuuteqarnerani qutsavigaara.

Ineqarnermut aningaasassarititaasut innuttaasunut tamarmiusunut pingaartumillu attartortunut pitsaanerpaamik atorneqarnissaannut Naalakkersuisut isumaqataapput, aammalu tamatumunnga suliniutit iluaqutaasussat suulluunniit tikilluaqqungaarlugit. Aammami ineqarnermut sanaartornermullu aningaasaliissutit nunatsinnut tamarmiusumut iluaqutaanissaat Naalakkersuisut Naalakkersuisooqatigiinnissamut isumaqatigiissutaannut ilaavoq.

Ineqarnermut tunngasunik iluarsartuusseqinnissaq piffissami sivisuumi suliarineqarsimavoq. Maanna Inatsisartut aningaasanut inatsisaannut 2017-imut oqaasertaliussaq, akuerineqarsimalerpoq, tassanilu Namminersorlutik Oqartussat inissiaataasa attartortittakkat 1. januar 2018-imi imaluunniit ersarinnerusumik isumaqatigiissuteqarnikkut akeqanngitsumik tunniunneqarnissaat pillugu Naalakkersuisut kommuninut ataasiakkaanut isumaqatiginninniarnissamut isumaqatigiissusiornissamullu piginnaatinneqarput. Isumaqatiginninniarnarit Namminersorlutik Oqartussat inissiarsuaataannut pilersaarutit, 2017-imi piareerneqartussat tunngavigalugit ingerlanneqarnissaat naatsorsuutigineqarpoq.

Immikkoortumut pilersaarutit suiarineqartut Najugarfiit immikkoortortaasa ingerlanneqarnerini pitsanngorsarneqarnerinilu torersaanissamut tunngavissiilluartussaapput. Kommunit taamaalillutik Namminersorlutik Oqartussat inissiaataannik toqqissisimallutik

tigusinissamut tunngavissaqarlualersinnaapput. Tamanna najugaqarfiit immikkoortortaasa ingerlatsinermut aningaasartuutaannut sunniuteqarluartussatut naatsorsuutigineqarpoq.

Tamatutaaq ineqarnerup nutaamik ilusilerneqarnissaa isumaqatiginninniutigineqassaaq, tassanilu aamma ineqarnermut aningaasaliissutit, taamatullu siunissami iluanaarutaasartussat kommuninut nuunneqarnissaat naatsorsuutigineqarpoq. Innuttaasut kiffartuunneqarnerat pisariillisinneqarsinnaavoq pitsanngortinneqarsinnaallunilu, suleriaatsit pisariinnerulertussaammata innuttaasullu qaninnerullugit ingerlanneqartussaallutik.

Naalackersuisut ineqarnermik aaqqissuusseqqinnermut ilagitillugu ineqarnermut inatsisit iluarsaallugit aallartippaat. Aaqqissuusseqqinnermi ilaatigut attartortitsinermut inatsit nutaaq, tunngavissanik ukuninnga aallaaveqartussaq iluarsanneqarpoq:

- Attartortitsinermut inatsisissap nutaap saqqummiunneqannginnerani ineqarnermut akiliutit siunissami katitigaanissaannik misissueqqissaarnissaq
- Sulisunut inissianik innersuussisarnerup naliliiffigeqqinneqarnera
- Inatsisit paasiuminarsarneqarnissaat
- Allaffissornikkut oqinnerulersinneqarnissaa
- Attartortut illersorneqarnerat
- Aqqiissutit ikinnerusut
- Attartornermut isumaqatigiissutip isumaqatigiissuteqarnermut tungaviusarnissaa
- Qanitanik tunngaveqarneq / innuttaasunut qanilaarneq

Attartortitsinermut inatsisissap saqqummiunneqarnissaa sioqqullugu ineqarnermut akiliutit siunissami katitigaanissaat misissoqqissaarneqassaaq, tassungalu ilanngullugu aaqqissuusseqqinnerup isumaginninnermut sunniutissai, aammalu inuit isertitakitsut akunnattunillu isertitallit inissianik imminnut pilersorsinnaanerisa annertusinissaanik Naalackersuisut anguniagaqarnerat misissoqqissaarneqassapput.

Suliaq taanna Aningaasaqarnermut Akileraartarnermullu Naalackersuisoqarfik kiisalu Isumaginninnermut, Ilaqutariinnermut, Naligiissitaanermut Inatsisinillu Atuutsitsinermut Naalackersuisoqarfik qanittumik suleqatigalugit ingerlanneqassaaq, taamaalillunilu ineqarnermut tapiissutit attartortitsinermut inatsisip nutaap atuutilernissaanut peqatigitillugu allanngortinneqarnissaat qulakkeerneqassalluni. Taamaalilluni akissarsiakitsut akunnattunillu akissarsiallit iluaquserneqarnissaat qulakkeerneqassaaq.

Naalakkersuisut attartortitsisarneq pillugu Inatsisartut inatsisissaannut siunnersuummik Ukiakkut ataatsimiinneq 2018-imut saqqummiussinissartik naatsorsuutigaat, tassanilu ineqarnerup siunissami aaqqissuussaanaissaa nutaaq, tassungalu Namminersorlutik Oqartussat inissiaataasa kommuninut tunniunneqarnissaat, kiisalu aningaasaliissutit tassunga atasut nuunneqarnissaat ilaatinneqassapput.

Naalakkersuisut ineqarnermi aaqqissuusseqqinnermik aallartitsereernerat, tassungalu ilaatigut Namminersorlutik Oqartussat inissiaataasa kommuninut tunniunneqarnissaasa 2018-imi ataatsimoorussamik tapiissutissat isumaqatigiinniutigineqarnerannut atatillugu tunniunneqarnissaannut isumaqatiginninniarnissat, kiisalu attartortitsineq pillugu inatsimmik nutaamik suliaqarnissaq eqqarsaatigalugit, siunnersuutip itigartinneqarnissaa inassutigineqarpoq.